

Visoki predstavnik pozdravlja otvaranje Regionalnog centra za povratak u Srebrenici

Visoki predstavnik, Wolfgang Petritsch, pozdravlja otvaranje Regionalnog centra za povratak u Srebrenici u organizaciji Ministarstva za izbjegle i raseljene osobe Federacije Bosne i Hercegovine. Svrha ovog Centra jeste podrška provedbi imovinskih zakona i koordiniranje aktivnosti federalnih vlasti i međunarodne zajednice. Centar je namijenjen ljudima koji se vraćaju u Srebrenicu, ali i ljudima koji se sa tog područja vraćaju u druge krajeve Bosne i Hercegovine.

Centar će imati multietnički sastav svojih zaposlenih, a služiće, između ostalog, i kao mjesto za prikupljanje zahtjeva za povrat imovine, zahtjeva za provođenje odluka, te drugih akata vezanih za imovinska pitanja. Centar će povratnicima također pružati i pravne savjete i druge neophodne informacije. Nadalje, Centar će raditi na iznalaženju donatorskih sredstava i na otvaranju novih radnih mjesta u tom području. Ured Visokog predstavnika očekuje da će otvaranje ovoga Centra umnogome poboljšati provedbu imovinskih zakona.

OHR smatra vrlo pozitivnom činjenicu da je federalni ministar za izbjeglice, Sefer Halilović, obećao pomoć za izgradnju 300 kuća na području Srebrenice. OHR također pozdravlja činjenicu da vlasti Federacije i Republike Srpske sada usmjeravaju sredstva za prioritetne zadatke u okviru procesa povratka koje je odredila Radna grupa za povratak i obnovu, iako treba napomenuti da je i dalje prisutna potreba za pružanjem podrške procesu povratka na teritorij Federacije.

OHR poziva Ministarstvo za izbjeglice i raseljena lica

Republike Srpske da otvori slične kancelarije u Federaciji koje bi radile na dvosmjernom povratku. U Sarajevu, istina, već postoji jedna takva kancelarija, ali je neophodno pokriti i druga područja sa velikim brojem povratnika.

Međunarodna zajednica uložila je značajne napore na poboljšanju situacije u Srebrenici i napredak na tom polju je očigledan. Uspostavljena je uspješna saradnja između općine Srebrenica i federalnih općina Ilidža, Hadžići, Ilijaš, Vogošća, Bugojno i Bosanska Krupa s ciljem ubrzanja provedbe imovinskih zakona i pružanja podrške dvosmjernom povratku. OHR također želi istaći da su pozitivno riješeni mnogi zahtjevi za povrat stanova na kojima postoji stanarsko pravo, a koje su podnijele raseljene osobe iz Srebrenice koje se trenutno nalaze u Tuzli i Sarajevu. Međutim, te osobe još uvijek nisu podnijele zahtjeve za izvršenje tih rješenja. OHR ih potiče da to što prije urade jer u protivnom rizikuju da izgube stanarsko pravo, t.j. ukoliko ne pokrenu proces izvršenja u roku od 90 dana nakon isteka roka koji je dat sadašnjem korisniku da napusti njihovu imovinu.